



Universitätsbibliothek Paderborn

**Gabrielis Cossartii E Societate Iesv Orationes Dvae: I.
Aduersus Nouitatem Doctrinae. II. Extemporalis defensio,
aduersus Satiram Francisci Dumenstier**

Cossart, Gabriel

Parisiis, 1651

Gabrielis Cossartii E Societate Iesv Extemporalis Defensio Habita III. Cal.
Mai. an. M DCLI.

urn:nbn:de:hbz:466:1-12233



GABRIELIS COSSARTII
E SOCIETATE IESV
EXTEMPORALIS DEFENSIO

Habita III. Cal. Mai. an. CICLI.

*Aduersus satiram à FRANC. DUMONSTIER,
eodem die recitatam.*

SCITVM est Euripideum illud ,
Auditores , veritatem in simpli-
ce neglecto que cultu placere ;
calumniam , nisi fucata industrie ,
magnisque operis & artificiis
adornata , tanquam è machina prodeat , non
placere . Quo minùs mirum vobis videbitur ,
Francisci Dumonstier orationem , quæ per-
petuum quoddam calumniæ textum est , se-
mestribus elaboratam vigiliis , vix tandem
prodiisse ; meam , quæ veritati patrocinatur
vni , extempore , ingenuam , nullis aut
ab arte pigmentis , aut à commentatione con-
quisitis argutiis , vix sumpto ad meditandum

a iij

spatio , securam exire. Veritati facit iniuriam , quisquis eam cerussâ , fucóque oblitus ; non est diuturnis lucubrationibus in lucem eruenda , quæ lux est ipsa per se: atque ut non diuturnitate temporis , & morosiore curâ elaborantur solis radij , sed sponte , momento uno profluiunt , terrâsque omnes , quibus sunt infusi , collustrant ; sic moras omnes odit , præciditque veritas ; erumpit in apertum sine molitione vlla , sine artis apparatu ; neque illustroribus ynquam ornamentis instructa est , quam cum propriis vnis , natuîisque resplendet.

Prodeat ergo pura veritas , simplex , sincera , inelaborata : quæ nunquam latere sine iniuria , nunquam conspici sine ornamenTo potest : prodeat , & offusam mendacissimâ obtrecta-
tione caliginem suâ luce dissipet. Postulor fal-
si , auditores ; & calumniæ , sed per calum-
niam , arcessor. Ac vobis velim , arbitris , &
disceptatoribus , controuersia dirimatur.

Septem fere menses sunt , ex quo ad solennem scholarum nostrarum instaurationem , publicè sum pro mei muneris ratione præfatus . Dixi aduersus nouitatem doctrinæ , & ita dixi , ut oratio mea clarissimis ordinum omnium viris , qui intererant , si non ab artis concinnitate ,

argumento certè ipso probaretur. Sed cùm
feriisset nonnullorum animos, & bilem iis
conciuisset, qui me partem aliquam religionis
petere & insimulare nouitatis, temere suspi-
cabantur ; cùm eos missitare iam & com-
moueri audirem : eam, ne calumniae pate-
ret, in lucem edidi. Neque tamen calum-
niā vel sic fugimus, quæ cùm valida & ro-
busta est, amat iis in rebus insigne quoddam
specimen edere, ad quas ne leuissimæ quidem
suspiciones adhærescunt. Ecce enim post tan-
tum tempus, tanquam in scenam hodie pro-
diit Monasteriensis iste, calumniam, calum-
niā, plenis buccis, contentisque faucibus
tragicè clamitans : & fortè clamitat etiam-
num : cùm enim veterum declamationum,
quibus in nos olim debacchatus est, consarci-
natos pannos omnes in illo cœtu explicet, ven-
tilétque ; cùm ad codicem suum identidem
cæspitante memoriâ confugiat : eo factum est,
ut & longior esset, & tardior, molestiōrque
maledicentia. Venerunt ad me modò viri, qui
adfuerunt, intelligentissimi: qui partim nau-
seâ victi & fastidio, partim ut ad tempus ad-
essent certa relaturi, affectâ iam & tantum
non absolutâ oratione discesserunt.

Ex iis intellexi hoc primūm à declamatore

quām atrociter , tam frigidē expostulatum fuisse , me classicum oratione mēā cecinisse: nihil illam anhelare nisi cædem & sanguinem: me Bartholomæanam aliam interencionem aduersū Iansenianos moliri: primas seditionis faces iactâsse. Quod hominis delirium mirati sunt , qui meminerant nullam orationis mēæ litteram eò spectare , ne apicem quidem vnum in ea rubricatum esse , qui cædem minaretur: statuebântque nihil esse deinceps quod fingi ab eo non posset , qui rem tam absurdam , tam abhorrentem , tam apertè falsam esset impune commentus.

Hinc tamen clamoræ & turbidæ accusatio-
nis exordium duxit , eandem nāniā sāpius integravit , lamentabilem in modum quiri-
tans: siue quōd theatralis illa iactatio placuit,
siue quōd naufragante toties memoriā , rece-
ptus in hunc portum commodus videbatur.
Aut certè , cùm neque instituti à me , neque suscepiti ab eo sermonis argumentum hoc es-
set: fanaticos illos terrores , quibus se conster-
natum non dissimulauit , somnium ipsi quod-
dam , vel propria conscientia fecerat: quæ de-
bitas sibi pœnas , si aliunde defuerint , fabri-
catur. Panicos illos metus , & lymphaticos
pauores secum ipse concoquat: non est meum
cos

eos depellere, quos non incussi: item hanc si-
bi ipse mouit, eandem secum ipse disceptet:
ego orationem meam tueor, non istius con-
scientiam apud ipsum purgandam suscipio.

Declamationis igitur caput hoc fuit, quo se
vno ad dicendum impulsum esse professus est:
falsò à me accusatum esse Ramum: calumniam
meam in regios professores, quorum ex ordi-
ne Petrus Ramus quondam fuit, redundare to-
tam: se vindicem, & propugnatorem ad di-
cendum surrexisse. Summa hæc criminationis
erat. Nam maledicta cætera, & volutatas in
truiis, conuiciorum sordes, aniles de nobis fa-
bulas, cloacam contumeliarum, quales eu-
meret pannucia Baucis, veluti assumenta quæ-
dam attexuit. Hæ sunt hominis elegantiæ, has
sermonis lautitias vnas nouit: iis horridæ, &
incultæ orationis asperitatem putauit suauis-
simè condiendam. Ego verò has illi mundi-
tias relinquō: sua sibi maledicta, tanquam in
proprio solo, commodè seruet. Assueuimus
iamdudum ad huiusmodi latratus obsurdesce-
re: quos glriosum est spernere; vincere, pro-
pudiosum. Si suæ tantùm obtrectandi libidi-
ni contumeliosus clamator indulsisset, dum
res stetisset intra iurgia, & pingue illud, quod
ipsi vernaculum est, maledicendi genus: ta-

b

cuiussem profectò, neque committerem, vt dimicare viderer eo certamine, in quo nulla nisi turpis est & probrofa victoria. Nunc autem quia præter fæces illas sordidæ, & illiberalis maledicentiæ, quæ vernulum magis, lixamque decuisset, facti quæstionem quandam, & controuersiam instituit: causam à conuiciis secernam, quæ res in eius oratione duæ conexæ & indiscretæ fuerunt: maledicta relinquam, quæ me minimè decerent; rem ipsam tractabo, quam à calumnia vindicari, publicæ fidei, litterarumque interest.

Nego quidquam à me per calumniam, quidquam nisi ex pura putaque veritate de Ramo esse dictum: nego regiorum professorum ordinem meis de Ramo verbis yllâ ex parte esse violatum.

Quid est igitur à me de Petro Ramo dictum? Auditores, hoc primum; turbâsse in Parisiensi Academia, quæ tota repugnabat: eius de dialectica doctrinam, Francisci primi litteris damnatam ac prohibitam fuisse: ipsi docendi munere interdictum. Hic verò, ô calumniatorem, ô sycophantam, exclamat Franciscus ille Ramaster. siccine piis Rami Manibus imponitur? vbi a&ta? vbi litteræ? vbi testes? Vbi testes! vbi litteræ! Reuiuisce, reuiuisce, Fran-

cisce Rex, & amplissimum mihi testimonium tuis ipse litteris redde. Testem hunc, opinor, Rami patronus non recusabit. Audite igitur Regem Christianissimum: audite eius diploma, quod extat ad memoriam eruditorum omnium sempiternam.

*Franciscus Dei gratiâ Francia Rex, omnibus hac lecturis S. Inter varia nostra studia..... nuper certiores facti de his turbis, quas filia nostra Academîa Parisiensi Petrus Ramus dederat. En turbat Ramus in Academia. Déque controuersia inter eandem Academiam, & Petrum Ramum. En Ramo repugnat Academia. Ad dit Rex delectos esse utrinque iudices, peritos viros, qui de Rami doctrina librisque cognoscerent; qui censuerunt RAMVM TEMERE, ARROGANTER, ET IMPUDENTER FECISSE, qui receptam apud omnes nationes Logica artis rationem, quam ipse præser tim non teneret, damnasset, & improbabasset. Quid de Ramo deinde dixi? proscriptam eius à Francisco doctrinam. Id ex Francisci verbis intelligite. pergit enim: *Nos vero horum auditâ sententiâ, re etiam cum aliis plerisque vi ris doctissimis, qui apud nos erant, communicatâ, libros illos duos, Animaduersionum Aristotelicarum, & Dialecticarum Institutio-**

b ij

num, damnados censuimus & supprimendos, eosque damnamus & supprimimus. Quid superest nisi ut, quod addidi postremum, philosophiae professione interdicat? Placet etiam, inquit, posthac Ramo non licere libros illos interpretari..... nec dialecticam, aliamve ullam philosophie partem ullâ ratione profiteri, nisi id à nobis eidem aliquando nominatim fuerit concessum: né ve unquam talibus conuiciis Aristotelem veteresque scriptores probatos, aut nostram Academiam huiusve alumnos audeat insectari. En mihi Rex dictorum omnium testis ac fundus est.

Quòd si veniam postea Ramus ab Henrico Rege impetravit: si regiae professionis munere per Lotharingum Cardinalem donatus est; decebat profectò, ut qui magisterij gradu deiectus ob nouitatis studium fuerat; in eo se, integræ ac sinceræ professione doctrinæ, contineret. Quid autem in omni deinde disciplinarum genere non tentauit? Quid non est de ipsius temeritate à viris eruditis vbiique scriptum? Laudant oris dignitatem, facilitatem sermonis, discendi auditatem, felicitatem memoriae, ingenij amoënitatem & industriam; hoc laudant: sed nouitatis studium, turbulentas in omni doctrina scholas, & ins-

lentem disciplinam, hoc conspirantibus sententiis, & propè vocibus, accusant. Auguste Thuane, quod tuum de Ramo iudicium fuit? *erroneam in Philosophicis doctrinam inuexit*, ^{Histor.}
Aristotelem voce & scriptis importunè oppugnans. Quid tibi hominis Ramus videtur,
Scæuola Sammarthane? mirum quantos *in Elog. lib.*
tota Parisiensi academia tumultus excitârit.^{1.}
 Gilberte Genebrarde, Quis Ramus fuit? *in Chronolog.*
linguas, artes, disciplinas, Theologiam denique ipsam furiosus. Et expostulabis, quòd Grammaticæ, quòd Rheticæ, quòd Philosophiæ inuersum ordinem ab eo, & vitiatas leges dixerim? Euolue ipsius de Grammaticalibros; quid non abhorrens à communibus institutis & usitata disciplina, non in græcæ tantum latinæque linguae, sed etiam in gallicæ nostræ rudimentis occurret? Lege scholæ Rheticarum libros octodecim; quæ in his pagina sine Aristotelis, Tullij, Quintiliani probro? & quam verè est à Petro Gallandio dictum, eum veterum scriptorum nemini, non *Aristoteli, non Quintiliano, non Ciceroni par-* ^{Epist ad Cardinal,}
cere: Euclidi, Galeno, reliquisque primæ note ring.
fere omnibus auctoribus comminari?

Restabat ultius Petro Ramo labor, ut qui nihil in cæteris disciplinis inausum &

b iiij

intentatum reliquerat, in Theologiam cādem petulantiā grassaretur: Theologiam, quæ doctrinarum est apex, vitæ norma, fidei columen, sacrarium religionis: cuius impe-
gisse ad limina, foedius est, quām aliarum dis-
ciplinarum penetralia violâsse. Ramum aio
Caluinianam hæresim professum fuisse: hoc
negas? Immo verò, & calumniam clamas.
Huc ergo testes, huc tabulæ.

ad ann.
1572.

Fidem Ecclesiastica in re quis magno
Spondano deroget? Is Petrum Ramum inter
Caluini sectatores, & hæreticæ perfidiæ causā
in Bartholomæana cæde interemptos nume-
rat. Ac postquam Caluinianorum procerum
necem descripsit: *Inter litteratos, inquit,*
eādem fuligine tinctus Petrus Ramus.....
homo turbulentæ vitæ, cuius hoc præcipuum fuit
studium, ut hæresim suis facultatibus iuuaret,
& scholasticos non tam imbueret litteris, quām
inficeret hæresi. Quid? non est idonea testis
vnius fides? Accedat ergo alter, testimoniūmque dicat Genebrardus, Theologus
quondam Parisiensis, Diuinarum Hebraica-
rūmque litterarum regius Professor, & A-
quensis demum Archiepiscopus. Hic dum
eandem Caluinianorum cædem commemo-
rat, *Postero, inquit, die, de aliis pœna sumptæ.*

tib. 4.
Chrono-
log.

Inter eos Petrus Ramus Veromanduus, turbulenta vita, & sui in linguas, artes, disciplinas, Theologiam denique ipsam, furoris supplicium dedit.

Quid ais? Rami discipule, Rami patronē. Iāmne calumniatus sum? Si ita est, ante me Genebrardus, ante me Spondanus calumnia-
tus est. Vadare ad tribunal tuum, par istud
præsulum, illos historiarum principes, illa
Ecclesiæ lumina; priorum duces interpretē-
que temporum; suorum magistros; oracula,
& exempla consequentium. horum de cri-
mine cùm cognoueris, meo me conuinces.
Immo quamuis calumniati isti fuissent, ta-
men ex quo tantæ sunt apud pios eruditos
que omnes auctoritatis; nulla in me calum-
niæ redundaret inuidia, qui nihil essem nisi
publica ex fide locutus. Teneris ergo calum-
niæ artifex, conuictus es: fatere iam falsum
à te mihi crimen obiectum; & tam nullo con-
silio, vt quibus verbis calumniæ mihi dicam
impingis, iisdem ipse calumniator manife-
starius tenearis. Sed quis ais? quid statuis? Ca-
lumniator est Genebrardus? Atqui profes-
sor erat regius: violas ordinem tuum, dum
hac labe Genebrardum commaculas. Nihil af-
finxit? profligata ergo Rami causa est. ego te

calumniæ coniectum teneo. Quò te vertas
his vndique laqueis irretitus? Cur ergo te di-
cteturum professus es aduersus Nouitatem calum-
niae? Hic enim calumnia vel nulla, vel vetu-
sta est: à Genebrardo scilicet profecta, qui cā-
dem quā Ramus ætate vixit. Hoc nimurum
erat: aut persuaseras tibi per summam insci-
tiām, aut persuadere nobis per summam ne-
quitiam volebas, à nemine Petrum Ramum
esse, ante me, nisi honoris causā nominatum;
non fuisse in Bartholomæana cæde, hoc nomi-
ne obtruncatum, quod Caluini de grege pecus
esset; non esse præcipitem è fenestrī actum,
raptatum per vias, in Sequanam proiectum.

At Carpentarij hostis infensissimi inuidiā
id factum est. Esto: an ideo minùs erat nocens,
quia eius crimen aduersarius prodidit? scio id
vulgò iactari, aliquos etiam insontes, in illa
internecione, aduersariis religionis nomen fal-
sò causantibus mactatos esse: sed qui manife-
sto Caluinianæ perfidiæ crimine tenebatur;
hunc, quamuis id agente inimico, quamuis
percussores redimente, insontem mactatum
non esse, hoc scio.

Vide autem, quām æquitate causæ meæ
confidam. Volo hæc testimonia tam luculen-
ta, tam grauia, tam certa; infirma tamen, &
leuia

leuia videantur : volo propè irrita , volo nulla.
Profecta sint ab inimicis : minùs sint accurata,
quæ in vasto illo annalium , rerum omnium ,
omnium temporum oceano promiscuè de-
scripta sunt. En peculiarem historiam profero,
vitam Petri Rami , conscriptam à Theophilo
Banosio , qui familiaris ipsi atque intimus erat:
libris eiusdem Rami de Christiana religio-
ne præfixam. Domesticum illud testimonium
est , minimèque suspectum. Quòd enim am-
bigere de eo Ramaster ille visus est , quòd igno-
tum hominis nomen esse dixit : cui demum
probandas tam infelicis criticæ cauillationes
putat ? Frigidum illud & ineptum exceptionis
genus est , quod à nemine antea cogitatum ,
ad rem tuam , desperatâ causâ , putidè confi-
ctum est. Sed vnde notus Banosius ? ex libello
suo notus. Quàm multi sunt , quorum nulla
ad nos nisi ex libris suis notitia peruenit ?
Quàm multi , quorum nullum extat nisi exi-
guum & tenue opusculum , & hoc Banosiano
minutius ? Exerce criticam eandem in Gene-
brardi Chronologiam , & Spondani annales :
dic supposititia hæc opera esse , quia contra rem
tuam veniunt : dic spurios esse libros omnes ,
qui Petrum Ramum apprimè Catholicum
non faciunt. Si vñus hoc scripsisset Banosius ,

c

esset fortè cur meritò de illius fide dubitares. Nunc verò conspirâsse ipsum , & coniurâsse furtim cum tot Catholicis, tot hæreticis auctoribus, quos iam protuli, quos modò appellabo ; vt Ramum ad Caluinianum hœdile inuidiæ causâ transferat : cui tandem hoc sobrio persuadebis ?

Ecce igitur in Petri Rami vita Banosius : *Ramus, inquit, obseruantissimus fuit Pontificia religionis, in qua primum educatus fuit : sed cùm ex sacris litteris verum cultum Dei deprehendit, cœpit pedetentim à tenebris Papatus deficere, Christianæ religionis solem assiduis precibus & votis exoptans Huius zelo inflammatus, publicâ concione Parisiensis scholæ monachos grauiter admonuit, ut puriorem theologiam ex euangelio, relictis sophistarum lacunis disserent. Idola Gymnasij Praelei amoueri, & recondi iussit, ne conspicerentur. Missæ autem raro intererat (nondum Caluinianæ fidei confessionem ediderat, quam anno tantum 1570. est amplexus.) Interrogatus verò hac de re à viro grauissimo, strenue respondit: è toto vetere nouoque testamento, nihil quicquam à nouis Christianis magis depravatum & corruptum esse, quam secundum mandatum legis, & cœna Sacramentum ; ut homo in utroque per speciem*

religionis in execrabilem idololatriam laberetur.
O flagitia! ô sacrilegia! Potuítne quidquam de Caluino ipso loqui, & explicare disertiùs? sed leuia tamen sunt ista, præ hoc vno, quod causam omnem continet. Ecce ad libri marginem. *Ramus cœnam Domini Heydelbergæ primū celebrat. In contextu verò; Cùm Heydelbergæ unà apud D. Immanuelem Tremelium anno septuagesimo viueremus, Gallicis concionibus semper interfuit; & sacra cœna, editâ primū fidei sua confessione, cum magno Dei timore, & cultus Diuini reuerentia, non semel communicauit.* Testis oculatus loquitur.

Si tamen ridiculus ille de Banosij nomine scrupulus adhuc te vexat: age, testimonium eius expunge, per me licet: sit auctoritatis apud te, fideique nullius. Quid de Nicolo Nancelio dices? An ignotum viri nomen? an obscura opera? Is, qui Rami discipulus, Rami familiaris, amanuensis, atque, ut ipse profitetur, per annos propè viginti contubernialis fuerat, in Petri Rami vita, quam scripsit ipse, & Rami discipulis dicauit: *Cùm Galliam, inquit, uniuersam duas potissimum in partes de religione, opinionibus diuisam variis, ac distractam cerneret: eā posthabitā, quam per reliquam vitam secutus erat, alteram arripuit*

c ij

& mordicus tenuit : quæ sui sibi fatti , ut propinqui , sic miserabilis & horrendi , intra paucos annos causam & necessitatem attulit . omitto quæ de fractis imaginibus , & eiusdemmodi aliis , Nancelius in eodem opere commemorat .

Sed quia Caluinianorum potissimum est suos dignoscere ; age , illius gentis proceres consulamus : vultis Theodorum Bezam , illius sectæ columen alterum , Caluinóque auctoritate supparem ? Profitetur hic postulasse Ramum , ut docendi sibi locus aliquis , professionisque munus in Geneuensi collegio concederetur . Negat satis ipsius postulatis fieri posse ; idque suis ad Ramum ipsum litteris negat , eodem datis anno , quo Caluinianam iste professionem ediderat . Vultis ex Caluinianorum

Edita an.
1582.

Martyrum historia sciscitari ? Hæc inter pugiles suos in Parisensi fidelium persecutione cæsos , Petrum Ramum annumerat . Vultis confessos ab iis Bartholomæanæ cædis commen-
tarios adeamus ? Illic Ramum eundem inter suos religionis causâ mactatos collocant ; cùm deinde peculiari loco Catholicos enumerent , quos per errorem tanta in strage torrens idem inuolutos abripuit . Vultis acta euoluamus cætera , in quibus illas suorum cædes , tanquam veterum Christiani nominis Tyrannorum

*Memoi-
res de l'e-
stat de
France
sous
Charles
neufième.*

carnificinas, describunt: vbique Petrus Ramus huic albo adscriptus occurret. Ecce dum suum numerant pecus, dum eorum recensio-nem instituunt, qui professioni suæ nomen dederant, quorum descriptio tam accurata, tam sedulò perfectus index, initúsque nume-rus, in publicis seruabatur tabulis, Ramum omnes gregalem suum agnoscunt: Caluinia-næ militiæ sacramento secum obstrictum, au-toratūmque profitentur.

Hæc autem quamvis certa & indubitata, testimonia tamen sunt, Auditores: testimoni-o maius quiddam, & grauius affero. Ipsum, quod superest, Ramum audite, loquentem etiamnum in libris quatuor *Commentariorum de Christiana religione*: quibus Caluini virus omne non furtim tegitur, sed quasi explicatur ad pompam, & ambitiosè ostentatur.

Sed hîc nimirum rursus postulor iniuria-rum, qui libros illos flagitosâ nouitate infa-mes, & à Ramo conscriptos asseruerim. Hîc rursus criticum hominis acumen triumphat; qui non aliam ob causam hos à Ramo com-mentarios abiudicat, quàm quia susceptæ cau-sæ incommodant: eum ferme ad modum, qui hæreticis nostris, professis illis, neque sectam suam dissimulantibus hæreticis, solennis est,

c iij

ut quos è sacris libris aduersari sibi intellexerunt, hos continuò negent Diuinitus acceptos esse, claméntque sacrosancto canone, ne sibi noceant, expungendos. Libri, quos Petro Ramo huc usque omnes adscripserant, quos sub eius nomine semper editos scimus, reclamante nemine, nemine dubitante, hodie Rami desinent esse, quia iudicio suo, sic tanquam prætoris interdicto, Ramaster quidam ita sanxit. Bibliothecas Simlerus, & Draudius ediderunt, hoc est indices auctorum librorumque omnium, qui à primis retro seculis ad ætatem usque suam peruererant: hos *de Christiana religione* libros annon Ramo uterque attribuit?

Iconum
Tom. 2. Enumerat Boissardus Rami opera omnia: num huius est ab eo prætermissa mentio? Quid tu igitur ex direpta eius bibliotheca perperam argutaris? perinde quasi recuperari nihil ex naufragio, & in amicorum manus redire potuerit: quod feliciter factum esse Banofius & Boissardus gratulantur. At editi sunt post eius obitum hi libri. Vide ne de Iansenij Augustino, quod posthumum itidem est opus, eodem iure ambigere videaris. Quid deinde superest? Hebraica sunt, inquis, in his commentariis vocabula quædam: cùm tamen hebraicè Ramus nesciret.

Sed hoc suspicaris ; eum hebraicè nesciisse.
Quid si ego contrà suspicer , extremo vitæ
tempore , aliquid ab eo de huius linguæ co-
gnitione delibatum , qui hospite Immanuele
Tremellio in Germania vteretur , viro hebrai-
carum litterarum illâ ætate scientissimo ? Sed
nostris vterque diuinationibus conieeturisque
parcamus : Hebraicè ille nescierit . Fecit , quod
scriptoribus , oratorib[us]que quotidianum est ,
ut si qua vocabula repererint hebraicæ græ-
cæve linguæ , in quibus vis quedam ad signi-
ficandum maior , aut vberior pleniorque sit ,
quamuis imperiti sint huiusmodi linguarum ,
iis tamen vocibus , quas sunt tanquam ex alienâ
supellestile mutuati , perinde atque propriis
opibus vti non dubitent . Quid est igitur , quòd
argutus iste librorum censor tam inanibus de
causis iudicium illud suum de hoc opere tam
præfractè tulerit ? cuius auctor , quamuis non
esset eius nomen inscriptum , satis tamen ex ip-
so stylo , & liberis in Aristotelem excursioni-
bus Ramus proderetur ; & vel si deessent cæ-
tera , hoc tamen agnosceretur vno , quòd le-
ctorem ad *scholas suas Physicas et Metaphysi-*
cas remittat , quæ Rami opera esse , professor ,
credo , non inficiabitur . Sed piget profecto
tantum temporis in tam futilibus nugis per-

*Commen-
de relig.*

Christ. lib.

l. c. 7.

dere , quas iactare tam insolenter quid aliud est , quàm litteris omnibus illudere ?

In commentariis illis suis quem se Ramus tuus profiteatur , h̄ic demum Ramuscule , post tam infelicem velitationem intellige : Vide , ut qui Geneuæ pestiferæ doctrinæ magisterium affectauerat , Geneuensem theologiam in libris suis pestilens professor , tot iam annis doceat .

Lib. 4. c. Petre Rame quot sacramenta sunt ? *Duo tantū sunt , baptismus , & cœna* & Christi auctoritas h̄ic satis est , duo tantū sacramenta in euangelio constituentis . Quid de

Lib. 3. c. 8. pœnitentia & confessione censes ? *Hæc confessio facta Deo , verè Christiana est* hæc confessio non est malefacti in aurem sacerdotis expositio . Quid de Eucharistiæ sacramento ?

Lib. 4. Totis capitibus duodecim , mera de hoc mysterio flagitia profert : *Carnalem præsentiam refutandam septem capitibus suscipit . De Missa Pontificia caput inscribit vnum , cuius sacrilegia omnia recitanti mihi , audienti-*

Lib. 4. c. 7. bus vobis , terrorem incuterent . *Christus , inquit , sanctitas ipsa sanctitatum (summum Pontificem illudit) cœnam instituit : apostoli & eorum discipuli , papa paparum , sancti sanctorum , cœnam celebrarunt , papalem missam ne-*

nescierunt. Quo nomine nostram in augustissimum sacramentum reuerentiam , & religionem appellat ? ἀπολατεῖαν : *Missa pontificia idolatriam* : *pontificios creophagos*. Quid de imaginum cultu censet ? Multis demonstrare contendit meram idolatriam esse. Quid de *iustificatione per fidem* , déque aliis Caluini *Lib. 2. c. 1.* scitis , & Geneuenfibus oraculis commemorem?

Ad tot portenta cohorrescit animus , audtores : video commotos vestros omnium sensus , auribus ipsis hæc monstra respuere. Et erit tamen , qui ea deosculetur ? Et quia hæc non veneramur , sycophantæ dicendi sumus ? Calumniator sum : quid ita ? quia Rami flagitia , quia Caluini sacrilegia non amplector. Iam compella Ramum tuum sanctissimis nominibus , pium , religiosumque saepius inclama. Hæccine igitur tua pietas est ? hæc tua religio ? hanc tu profiteberis ? ad hanc discipulos tuos erudies ? Nam tui certè muneris est , quam pietatem plurimi facis , eam auditoribus tuis commendare. An eos ad Rameam illam insti-
tues ? illam , quam tam prolixis laudibus , tam amplis præconiis ad cælum extulisti ? hanc si probas , cur non profitearis , doceásque ? si abhorres , cur tantopere laudasti ? Exspecta-

d

mus , Catholice professor , quid de Caluino sentias ; cuius doctrina quid immanius in omni sua professione continet , quam quod illa Rami pia , & sancta mens amplexa est ? Qui Caluinianum illud ramale tanto studio protegit , tam sancte veneratur ; cui oratio aduersus doctrinæ nouitatem dicta , vnguis fuit in vlcere ; qui eâ se petitum percussumque declarat : is , si qui laruati Caluiniani essent , nonne meritò eorum haræ accensendus videatur ? Cur Ramum tueris ? an quia Caluinianus est ? Cur nouitatis patrocinium suscipis ? an quia Caluiniana est ? Tecum hoc ipse statue .

Interim quanquam afflictum iam & profligatum est numen illud tuum , Francisce Ramaster : tamen quia vix unquam se victam factetur quorundam hominum procacitas ; decretria tandem est proferenda sententia . Eritne autem post tormenta illa , quibus euersa calumnia est , grauius aliquid , quod repe riri possit ? Erit , auditores , erit . Cogita , Francisce , quidquid causæ tuæ infestissimum esse potest : vincam tamen ipsa rei magnitudine cogitationes tuas . Quid ? telum exspectas ? fulmen iaculabor . Supercedendum cæteris testimoniis erat , auditores ; ut hoc , quod super est , uno res tota conficeretur . Cætera per me

licet recordatione vestrâ excidant : id modò memineritis vnum, Petri Rami nomen ad Tridentini Concilij calcem, in auctorum prohibitorum indice reperiri. Cuius indicis quanti facienda sit auctoritas , & quam non leuisbus coniecturis , humanisque iudiciis pendenda, satis intelligit, qui eum nouit Tridentini primùm Concilij decreto factum ; deinde à Sixto V. & Clemente VIII. Pontificibus, per eruditissimos sapientissimosque viros, quibus hæc mandata cura fuerat, auctum esse. Quem verò in eo locum Ramus obtinet : in prima classe, inter eos scriptores, quorum non liber tantum aliquis, sed nomen ipsum hæresis causâ proscriptum est : inter omnium auctores ipsos & parentes hæresum ; eadem in tribu , in qua Lutherus Caluinusque censentur.

Hic verò vestram, auditores, fidem obsevero: adeōne quenquam esse nauiter impudentem, vt cùm hæc sciret, Ramum tamen tueri, eius commendare pietatem, religionem prædicare sit ausus ? adeōne stolidum, vt si ignorauit, libros non adiret, peritos non consulteret ea de re, de qua sibi dicendum intelligebat ? Nesciebam. In hoc professionis regiae gradu ? in tanta librorum multitudine ? tan-

d ij

to eruditorum, quibus cuni versari potes, numero? tam recenti harum rerum memoriâ, quas ex antiquioribus sâpe audire potuisti? Audieram. an tu igitur inter eos nomen profiteris, qui Romanorum Pontificum auctoritatem, (quorum iussu, Tridentino indici, Petri Rami nomen adiectum est) qui Tridentinam ipsam synodum sacrilegè cauillantur? Nesciebas? Stoliditatis est, de re, quam ignores, dicere: sciebas? impietatis est, prædicare flagitia, factilegia consecrare. Calumniæ fuit, calumniæ me arcessere: calumniamorem eum pleno ore, & tragicis clamoribus vocitare, qui nihil nisi publicis monumentis consignatum, nisi publica ex fide, & ipso ex veritatis sinu gremiisque protulerat: quique pauciora multò de Rami nequitia dixerat, quam quæ produci verè potuissent.

Hic mihi tu frigidas illas, & derisas argumentationes inculca: eas virorum eruditorum testimoniis, Catholicorum annalibus, hæreticorum commentariis, ipsius Rami confessioni, Tridentino denique indici oppone. Dic electum ab Henrico secundo Regium professorem: dic à Lotharingo Cardinali, ab Audomaro Talæo, à viris integerrimis amatum: dic mathematicam ab eo professionem

constitutam de suo, & idoneis redditibus dota-
tam: eius testamentum quām poteris clamofis-
simē recita. his subiectam intercalarem illam
laciniam flebiliter decanta; & erit hereticus Ra-
mus? & erit perduellis Ramus? Scilicet Calui-
nianam hæresim non est anno s̄eculi sui septua-
gesimo professus; quia quinquagesimo primo
regiis ornatus beneficiis fuerat? Non transiit
in Caluini castra, annis ante obitum duobus;
quia in optimi Cardinalis gratiam ante annos
viginti fuerat admissus? Eum purgat ab hu-
ijs suspicione sceleris, magni Talæi amicitia,
qui tantò antè quām esset admissum, fuerat
summo academiæ desiderio, immaturâ mor-
te præceptus? Non est cum perduellibus cæsus;
quia cum probis aliquandiu vixerat? Gene-
uæ docendi munus non ambiit; quia Lutetiæ
mathematicam professionem priùs institue-
rat? piâ & catholicâ morte perfunctus est; quia
testamentum conscripserat, annis ante obitum
quatuor; quo testamento quingentas in stipen-
dium Mathematici professoris annuas libel-
las legat, centenas auunculo suo, sororis filio
centenas; atque id genus alia; quæ quis ho-
nestiorum hominum, & minimè proiecto-
rum, Geneuæ non faciat?

Hæc scilicet Rameæ causæ firmamenta, &

d iij



præsidia sunt : hæc fulguritum hominem expiant, conuincunt annalium fidem, sacris ipsis oraculis silentium imperant. Quid ais, bonarum partium patrono ? Idonea scilicet erat hæc causa, in qua te tam ambitiosè iactares ? idonea illa religio, cui defendendæ, cui prædicandæ tantum tempus impenderes ? quâ certè oratione fiet, vt laudes tuas deinceps boni omnes in opprobriorum loco numeraturi sint ; quâ factum est, vt gloriosum mihi duxerim, eodem ore, me maledictis, Caluinianam pestem laudibus onerari. Quanti redemptum voles, nunquam pro Ramo dixisse ! quam altis tenebris semestrem illum partum damnatum cupies ! sed quid agas ? iacta est alea. Quod superest, hoc in posterum caue, vt sis & in diligendis causis prudenter, & pudenter in tractandis.

Verùm quia non Rami vnius, sed ordinis sui causam agere se professus est orator : quia per Rami latus, professores à me cæteros peti, & ex vnius probro, factam vniuersis contumeliam professus est : faciam, vt intelligatis deinceps, non minùs hebetem cum in defendendo professorum ordine, quam in vindicando Ramo fuisse. Evidem sum hominis iudicium miratus, qui causas simul duas agen-

das suscepit: quarum altera peior erat, quām
vt defendi posset; altera melior, quām vt de-
fendi deberet. Nam & turpior est Ramus,
quām vt vir ei probus faueat; & integrior est
atque laudatior regiorum professorum ordo,
quām vt defensione indigēat. Cedo enim, à
quo, & quā tandem iniuriā est ordo ille viola-
tus? Ramum, inquit, dum notasti; vniuersus
à te ordo eādem maculā notatus est. Nouum
crimen, auditores; noua, & insolens, & à ne-
mine præterquam à professore isto lata lex; vt si
cuius est publicum manifestūmque scelus, &
monumentis omnibus contestatum, commie-
morari à quoquam, citra ordinis, cui quon-
dam addictus ille fuerat, dedecus non possit.
Quod si ita est: quæ tandem usurpari verbis,
& in exemplum adduci flagitia poterunt?
Cùm enim scelerum auctores omnium, aut in
ordine aliquo & sodalitate vixerint; aut co-
gnationis, quod arctius est vinculum, & affi-
nitatis, necessitudine quadam cum aliis sint,
nexūque coniuncti: erunt semper, qui læsos
se ac violatos expostulent, si qua crimina &
dedecora sermone perstringantur. Quo quid
dici & à ratione abhorrentius, & vtilitati vi-
tae, conformandisque hominum moribus ma-
gis contrarium infestūmque possit?

An læsos se Augustiniani Patres expostulant, cùm hæreticus, cùm scopulus religionis, cùm Ecclesiæ pernicies Lutherus appellatur? An conquestus est vnquam Nouiodunensis clerus, cùm Ioannem Caluinum, desertorem Christianæ religionis, prædonem sacrorum, Europæ procellam ac turbinem appellari audiiit? An factam sibi iniuriam clamat Illustrissimus Episcoporum ordo; cùm Iacobus Spifamius, cùm Andreas Duitius, cùm Antonius Dedominis, inter hostes Christiani nominis, & perfidos ab Ecclesiæ signis transfugas numerantur? An indignatur Eminentissimus Cardinalium Senatus, cùm Odonem Castilionarioem audit Caluiniænis partibus studuisse? Nullus antehac ex iis ordinibus, commemorari suorum malefacta vetuit; neque, si qua iis labes inhæserat, eâ se putat aspersum, dum quotidianis sermonibus renarratur.

Publici iuris exempla ista sunt: prostant erudiendæ posteritati: periit ordini suo eorum honos, cùm iis ipsis per scelera sua periit. Non iam ex collegio vel sodalitate ylla, sed ex annalium gente sunt. Ius habet in eos suum historia: eösque nobis ad præceptionum, ad tragœdiarum, ad sermonum omnium argumenta commodat. Vnus legitimam hanc pos-

hanc possessionem; annalibus, historiis, memoriæ nostræ præripere tentat hodiernus orator; & quia togæ suæ vmbiâ Petrum Ramum protegit, tutiorem vult esse, quam si Antistitum infalis, Romanorūmque procerum purpurâ tegeretur.

At certè quidquid usquam est cordatorum hominum, hoc impensis solet improbitatem aliquam damnare & abominari flagitia; cùm ab uno quopiam ex ordine aut collegio suo profecta sunt. Quò videtur labes illa propior, atque coniunctior, hoc eam vehementius refugiunt & aspernantur; ne quâ possint suspicione communionis afflari; atque ut de vniuersi sanitate corporis & integritate constet, si quod in eo putridum infectumque membrum fuerit, longè à se causaque sua disiungunt. Tu perdisti hominis causam cum ordinis tui causa implicatam vis esse: & qui ab illa societate, omnique honoris commercio, flagitiis suis auulsus est; hunc quasi postliminio reuocatum, eandem rursus in sodalitatem intrudis, quæ nisi funestari ab illo non potest. Professorum ordinem violauit: quid ita? quia, si superis placet, Ramum, Ramum esse dixi. Ego verò tuis à te factam iniuriam contendeo, dum eius suscepto

e

patrocinio te ordinis tui vindicem professus es.

Nam si quis fuisset in illo cœtutam peregrinus, qui te probum, & sincerum oratorem putâsset, non calumniatorem professum, non famosissimæ maledicentiaæ declamatorem ; is cùm te dicentem audiisset, quid existimâsset aliud, quàm te collegarum tuorum nomine, Ramo patrocinari, ordinem tuum Ramo vniuersum fauere ? Hanc iis notam, si non esset eorum perspecta integritas & innocentia, inurebas. Eos accusabas, dum hanc eorum defensionem institueres, ipsi se aduersus calumniam tuam vnâ probitatis suæ famâ defendebant. Quid est quòd vt Rami causam adiuues, partem in eos inuidiæ atque offensionis exoneras ? Norant hominis mores, doctrinam norant; deprecabantur communionem nominis atque famæ : tu eorum famam cum Rami honore atque nomine vis esse coniunctam : perinde quasi nihil habeant per se veræ & sinceræ laudis, nisi ementitam & adulterinam, ex falsa personati Rami probitate mutuentur.

Hoc iterum atque iterum asseuero. Nemo maiorem ordini tuo maculam inussit, quàm quæ hodie oratione tuâ illata est. Tu collegas tuos, viros integerrimos, quorum par est doctrinæ pietatisque laus, Rameæ doctrinæ fau-

tores facias? Dic eos Luthero, dic Caluino, dic cæteris hæretici nominis doctoribus suffragari: quid fœdius in eos confinges, quàm cùm huic Caluiniano nepoti studere, huius amplecti & fouere doctrinam persuadere conatus es?

At eorum interest, Rami collegæ quondam sui honorem, per fas, per nefas tueri. Professor regius, opinor, Carpentarius erat, quo quem hostem Ramus capitaliorem habuit? Extant plena vehementissimis in Ramum orationibus, eius volumina, quibus perniciosam illius doctrinam exagitat: ratus sui, collegarūmque honoris interesse, ne tam exitialibus doctrinis fauere censerentur. Professor item Regius Genebrardus fuit, quo viro quid varietate doctrinæ instructius? quid vitæ sanctimoniam probatius fuit? Quod de Rami doctrina iudicium tulerit, audiistis. Quid autem agebat Genebrardus? quid cogitabat? sic ordinis sui honori consulebat professor regius? Suo suorūmque honori bene consultum vir sapientissimus duxit, si omnem à sodalitate sua erroris & nequitiae suspicionem remoueret. Theologus enim, & Parisiensis Theologus Genebrardus fuit; qua in facultate quòd nullum sit gradum adeptus, artiūmque magiste-

e ij

rio contentus sit noster ille Rami defensor,
quitamen inhiat ad honores illos academicos:
satis hoc prodit indicio, quām sit theologica-
rum litterarum expers; & quantō æquiūs in
Genebrardi iudicio, quām in suo, acquiescere
de Petri Rami theologia debeat. Cui viro si
maledixeris Franciscē, quōd tamē feuero iudi-
cio Ramum affligat: erit hoc scilicet ordini
tuo gloriosum, te professorum Regiorum al-
teri fauere, quia Caluinianus fuit; alteri, quia
est eximiè Catholicus, aduersari. Eò patro-
cinium tuum recideret, vt ordinem tuum,
dum his defendis artibus, crimineris.

Vide autem quām infelix patronus hodie
fueris, non tantū in illa ordinis tui causa,
sed etiam in tota declamatione, quā lites
plurimas magnus ardelio turbulenter mou-
isti; omnes, dum aduersus te ipsum agis, a-
misisti? Nam vt specimen tibi aliquod tua-
rum in te incursionum exhibeam: pro Pa-
risensi academia, multa, vt mihi quidem
relatum est, dixisti: quo consilio? nōnne vi-
debas te pro aduersario ipsius Ramo dicere?
Ramu defendis? contra Parisensem Aca-
demiam facis. Academiam tueris? aduersaris
Ramo: eius doctrinam damnas: mihi allabo-
ras. Quōd te vertas? qui stupor ille tuus, qui fu-

ror est? quæ vñquam oratio vehementius secum ipsa conflxit? Age verò, pro Ianseanianis an commodius dixisti, & felicius? quorum hominum causam quòd tueri te professus es, quis valdè miretur, quando Calvinianam defendisti? sed hoc miror, plùs ei te defensione tuâ, quam omnes antehac aduersarios, omni virtute atque industriâ, nocuisse. Nam quæ tanta tua vel perfidia, vel inconsiderantia fuit, vt quod ad hanc diem illi tacuerant, quod si obiectum ab inimico fuisset, acerrimè refutassent, id publicè profitereris; eos oratione illâ, quam aduersus doctrinæ nouitatem habui, offensos; eâ se petitos arbitrari. Quæ de nouarum contumacia & perduellione sectarum, de Calvinianæ factionis primordiis, de purioris theologiæ & vitæ sanctioris ementita professione, de clandestinis conuentibus, de coniurationibus in rem publicam, de ciuilium bellorum facibus à me dicta sunt; iis se designari quisquam, nisi malè sibi conscius, crederet? siue autem eorum effers arcana, siue falsa quædam comminisceris; vide, quam tua sit in eos iniuriosa declamatio, & quam subitâ conuersione accusator ex patrone sis factus. Sua ipsis exprobrantur criminâ, quoties Calviniana narrantur? minatur iis

e iij

supplicia, quisquis petitas ab hæreticis poenas
commemorat? Quis hoc ante te dixerat? quis
tantum de illa hominum gente suspicabatur,
quantum tu fateris, non adactus, non impul-
sus, ne rogatus quidem; sed voluntarius, an
testis? an delator? Est autem, cur vobis ab eo
timeatis, auditores, qui se doctrinæ istius fau-
torem tam audacter, & inuercundè profes-
sus est. Ego si quando hominis alicuius ora-
tionibus interessesem, qui Caluinianæ causæ
patronus fuisset, quem pupugisset oratio ad-
uersus doctrinæ nouitatem habita; id caue-
rem primum, & ante omnia vnum cauerem;
ne suis ille sermonibus, vel ex Caluino, vel
simili quodam ex fonte, aliquid pestiferæ no-
uitatis aspergeret.

Id enim profectò, id oratione suâ quære-
bat, vt factum nouitati conuicium vlciscere-
tur: id deinde alterum; vt factum maledictis
stomachum in nos effunderet. Rami causa,
non propositum, sed occasio fuit. Aditum
hunc sibi patere commodum duxit ad calum-
niandum liberius, & in omni probrorum ge-
nere bacchandum. Quid enim maledicentiæ
(vos, qui aderatis, testor) prætermisit? Quæ
infarta non sunt, & intrusa mendacia: anti-
qua, recentia; sua, aliena; omnia effudit. Tan-

ti erat , dum publicam illam maledicendi professionem exercebat. Sed erant illa viri minimè mali mendacia ; adeo stolidè mentiebatur : vt mirum sit , qui tandiū se in arte illa exercuit , tam parum profecisse. Quæ quidem omnia retexere , neque fas in tanta multitudine , neque porrò necesse est , cùm ipsâ suâ inanitate vanescant. Humiliora sunt quædam , & indigna grauitate orationis : turpiora nonnulla , & molesta verecundis auribus , quæ tamen ipse quām finxit turpiter , tam parum pudenter in honestorum hominum cœtu explicuit.

Vide autem , Francisce , quantò æquiores in te humanioresque simus. De te , moribúsque tuis multa nobis , vt minimum dicam , parum commoda , narrata sunt : nunquam vulgauimus. Multis ex academia sodalibus tuis inuisum te indoles ista reddit , de qua in præsenti nihil exprobro. Lenimus illas odiorum asperitates , suademus vt si quid in te impotius est , placidè ferant. Vitæ tuæ acta subministrarunt nobis alij : sperabant ad ignominiam tuam edenda : non facimus. Hodie te dicentem discipuli nostri riserunt. Veniebant ad me identidem , certis quibusdam interuallis temporum , qui de oratione tua renuntiarent : aiebantque minimè politam esse ; mini-

mē latinām : inconditē atque temere nullis
grammaticæ, nullis rhetoricae legibus ferri ;
nullo vocum delectu , nullâ concinnitate nu-
merorum ; modò nimium abiectam , modò
plus æquotumentem : ubique laciniosam . hoc
ad nos pueri ipsi referebant : eos ego voce v-
nâ compesceram : professor est regius . Quid
aliud amici in causa fieri à nobis dicique po-
tuisset ? Quām hoc iniquum est , dum hono-
ri tuo tam studiosè consulimus , te in nostrum
hostiliter incurrire !

At nobis , nominique nostro si parcendum
non duxisti : tibi certè parcere ipse debuerat .
Quem putas esse hominem sensum , dum te
conuicia teterrimis faucibus in nos euomen-
tem audiunt ? quid te assequi declamatione
tuâ putas ? ut exclament ? ô sceleratos Iesuitas !
Tuæ sunt vel ineptiores , vel atrociores calum-
niæ . Hic , si nescis , illorum sensus , hæc verba
sunt : ô fæcem ! ô fordes ! ô maledicum ! ô in-
gratum ! qui eos à quibus est olim , in humiliore fortuna , beneficiis affectus , tam indignè
adhibet . Observant nunquam esse , in acade-
mica villa concione , ab ullo qui liberaliter
educatus esset , nunquam nisi ab hominibus
vilissimis , & honestatis omnis expertibus ,
contumeliosum illud in nos dicendi genus
vsur-

vsurpatum. Quod dum à te frequentatum vi-
dent, cogita quæ de te iudicia sint; quæ no-
mini tuo labes adhærefcat.

Vide qui sis, Francisce: non iam es ex illo
grege tenuiorum hominum, cui ius est quod-
dam in omnia scurrarum, & balatronum con-
uicia, & furere impune obtrectando licet: con-
ditionem olim tuam ista fortasse decuissent.
Nunc verò, cùm Regius Professor, cùm vir
spectabilis factus es: cur non totus elegans eu-
dis? totus honestus? totus aliis, atque olim
fuisti? Cur illam maledictorum fæcēt ex ve-
tere tua supellecstile seruāsti? Spes est autem,
spes est, auditores, breui excutiendum ab
eo, quidquid ex primis illis moribus concre-
tum adhuc inolitūmque supereſt. Et in dies
certè fit elegantior: mitigatur sensim, & ex-
politur hominis ingenium: dediscit vernilem
illam licentiam. Dediscit, inquam; nam qui
nuper inter altaria, dum esset Rector Am-
plissimus, nulli conuicio parcebatur; rabisum
eum hodie oportebat in auditorio suo videri,
niſi ponere aliquid de pristina indole cœpisset.
hoc autem audio, atrociorē eum illic non
fuisse, quām inter aras fuerat. Pars hæc huma-
nitatis est, non fuisse inhumaniorē.

Ex quo fructum hunc hodie cepit, quòd

f

42 EXTEMPORALIS DEFENSIO.

temperauerim ipse mihi, & remissè cum eo le-
nitérque agendum statuerim. Audiistis, quām
non iracunda, quām placabilis, quām beni-
gna oratio mea fuerit. Et vereor quidem, ne
in illa Calvinianæ doctrinæ causa, quam ve-
hementiùs solent moderatissimi quique tra-
ctare, mollior ego, indulgentiórque sim vi-
sus. Sed nimirum lenitate videri malim, quām
asperitate peccasse.

DIXI.

AD FRANCISCVM DVMONSTIER.

ORATIONEM tuam, vt audio, recognoscis impigre,
& vt in lucem ornatiōr prodeat, diurnis nocturnisque
laboribus expolis : cupidē illam exspecto. Eam à maledi-
ctis insignioribus, amicorum hortatu, repurgas : in anteces-
sum gratulor. De Rami vita, quod antè factum oportue-
rat, consuluntur antiquarij, omnes bibliothecarum foruli
vestigantur: diligentiam hanc, quamuis sera est, laudo. V-
num, quò tuis amicorūmque laboribus parcas, moneo ; ne
infides iis corrogandis testimoniis, quibus doceas, Ca-
tholicum aliquando Ramū fuisse; hoc enim non ambigi-
mus : sed ea conquiras vna, quæ talem eum conuincant
fuisse post annum superioris sæculi septuagesimum ; quo
tantū anno Calvinianam professionem edidit. Luculen-
torum huiusmodi testimoniorum segetem vbi repereris,
Romam mitte; vt eorum ex fide Tridentinus index emen-
detur. Vale.